

Pauro Onesimu tsyhyryze Piremo bo ziwatahaka

Tubabatu wastuhu kytsa tarabaja ziknakaranaha sitsihitsa batu okyrysaro ty sibo nyny nikaranaha. Kytsa sinamy wa niyziknaha paikpa sihumo okyrysaro ty ziknasihuakaknaha iwaze hi ziknasitsihitsakanaha. Iwatsatu sisakihikytsa tahatsumuēhītsitsa nasisapybyriki. Onesimu tatsihitsa papatu niwakik iwaze Pauro harere ziwabyze Sesus tukta niyzik. Pauro itsihitsa bo ziksiwyhikzoze itsyhyryze papeu humo ziwatahaka. Onesimu tsihitsa Piremo inarokota atahi Pauro iharezeziu ata bo hi Onesimu humo ziwatahaka.

¹ Uta Pauro. Ikia Piremo bo piwatahaka. Sesus Kiristu soho iktsasoko ana humo hi kytsa siakryiukrēnikitsa hurukwy bo zikoktyhyryknaha. Mytuky Timoteo katuk mykara. Ata kino katuk papeu humo piwatahaka. ² Katsakta Sesus tuktsa bo papeu humo tawatahaka. Asahi awahoro bo inauzuzuknaha. Myzawy Apia bo piwatahaka. Arakipus kino niwatihi atakta sodadu wata atahi mytuk Sesus tsyhyryze tarabajaziu mynakara. Sesus tuktsa awahoro bo mynakypyknahaze papeu ty sibo tsipinyny. Ikia mytuk Sesus tsyhyryze tarabajaziu tsimykara. Katsakta ikia humo mympokzitsirētsa.

³ Ahatsyhyryze Deus bo mopamykysoko. Sesus Kiristu mypehatsa bo niwatihi mopamykysoko. Ispe mynakara:

— O Deus myzo Piremo bo tsisapywyky. Sesus tuktsa iwahoro bo inazuzuknahaze tysisapywyky. Tysipokzitsikikta! Ba paikpa mytsaty tynakaranaha. Ikia humo sakurētsa moziknaha — mykara.

**Piremo Sesus humo tispirikporēta. Iwaze
kytsa humo tsimypokzitsiukrēta.**

⁴⁻⁵ O kaharezeziuwyttsa Piremo. Kytsa tihi:

— O Piremo mypehakatsa Sesus humo tispirikporēta hỹ. Atakta Sesus tuktsa humo tsimypokzitsiukrēta — mykaranaha. Ana iwabyze Deus bo asoho mopamykysoko:

— O Deus myzo Piremo humo kakurēta mykara. Tspisapywyky Piremo bo ustsas Sesus tuktsa bo niwatihi — my. ⁶ Katsakta ikiahatsa tuk Sesus

humo myspirikporêtsa. Myspirikporêtsa babatsa zeka hawa Sesus tazo bo mymyoktyhyryk naha humo tanymyrytohinaha. Sesus humo mykurêtsa babatsa tsipinymyryknaha.

⁷O kaharereziuwu ahumo kamypokzitsiarêta. Ikia Deus hyrytsa humo tsamypokzitsiukrêta ana iwabyze kakurêta. Iwatahi ikia humo kapunihikrêta mozik. Ikia kytsa ba ziksimyiyu ustsas Sesus tuktsa nisiakusukni.

Pauro Onesimu tsyhyryze myzapykyky.

⁸Iwaze katsaktsa Sesus tuktsa humo mymypokzitsiukrêtsa. Hawa tykta tsimyzeka ba zapeha. Sesus Kiristu humo aziky wata ikia bo zuba motsaso. ⁹Katsa tsimiharape pokzitsikinaha. Kaharere bo yhy tsimykarana ikia kino tsimyzihikik. Iwa abo motsasoko. Taparakta ppykyhy Sesus Kiristu wasania ty iktsasoikik ana humo hi kytsa siakryiukrênikitsa hurukwy bo zikoktyhyryknaha.

¹⁰Abaka Onesimu soho motsaso. Utakta siakryiukrênikitsa hurukwy eze tuze atahi Sesus humo tispirikporêta. Kaharere bo Sesus soho humo hy nizaraze iwaze Sesus humo tispirikporêta niyzik. Iwatahi katse wata niyzik. Ihumo kamypokzitsiarêta. Ikia tsipiktsumuêhi naha humo hi mozihikik. ¹¹Taparaka atakta asohometuwu. Aharere bo batu yhy ziknakara. Abaka atakta Sesus humo mektatu niyzik. Kaokzeka tsimysapyrêta patsumuêhi. Botu ziktsumuêhiki. Ata hi tsimysapyrêta iwatahi mymytsumuêhi.

¹²Onesimu humo kamypokzitsiarêta. Iwatatu abo piserezo.

¹³Siakryiukrênikitsa hurukwy eze Sesus soho wasania ty iktsasoko naha humo, atakta katuk natasapy tsihikik, iwaze piktsumuêhi. Atahi asapyzeka mozik. ¹⁴Aharere piwaby tsihikik. Ibete yhy tsimyzeka uta kino niwatihi hy my. Ba zapehariziubyi.

¹⁵Atakta nokponi niukuru. Taparaka atuk batu are. Tozeka ja inaparak iwaze myziksizozo atuk tawahi mynapykyryk. ¹⁶Taparaka atuk tarabajaziu ziknakara batu okyrysaro ty ibo nyny tsiky. Ipehakatsa tsikyzyk. Abaka atsy hi Sesus humo tispirikporêta. Ihumo kamypokzitsiarêta. Ikia kino ihumo tsamypokzitsiarêta babata atsyhyryze tarabaja mykara. Atsy wata Sesus humo tispirikporêta. Iwatahi ihumo tsimypokzitsiarêta.

¹⁷Ikia hi:

— O Pauro katukta. Sesus harere humo harapetok tarabaja tsimykananaha — tsimykarana. Uta awahoro bo my zeka kape:

— Pakutyny — tsimy. Onesimu bo ka wa tsimy my. ¹⁸Taparaka abo imysapybyita tu nikara. Anamy ziake zeka zamyi. Amy ziake zeka papeu humo tsiwataha. Anatyhi itsyhyryze piserezo. ¹⁹Abaka katsyhyryty piwatahaka:

— *Uta Pauro abo pisirezo.* Amy ty Onesimu ziaксе zeka ana kino uta pisirezo — my. Ikia Sesus humo tsaspirikporēta kaharere humo. Deus tuk awahi tsimynapykyryk. Deus wasania ty tyso byizeka batu aspirikpo. Anahi kabo tsipisirezo wata anasoho bo mytsatziutykta! ²⁰Iwaze katsaktsa Sesus humo myspirikporētsa ikia Onesimu humo tsimypokzitsiukrēta! Katsy my. Awahoro bo pomoze:

— O pakutynykta — iwa tsimyzeka kakurēta mozik.

²¹Botu iktsaso:

— O Onesimu katsy humo tsimypokzitsiukrēta — my. Ikia kaharere bo hỹ tsimy kara kahyrinymyrēta. Hawa Onesimu tsyhyryze myzapykyky wasani isopyk. Iwa piwatahakaze ta botu mytsaty mykara.

²²Iwaze kawanu sapy tsikymynahaktsa! Hawa ikiahatsa katsyhyryze Deus bo tsimypamykysokonaha utakta iharere piperyky. Amy ty ibo tsizapykykynaha anahi Deus ahabo yh̃ my. Kytsa tihi:

— Tsipiksi za — maha hi piperyky.

Abaka pepykykze kytsa bo mytsaty mykara.

²³Epararas ikiahatsa humo tsihyrizikbarēta. Atakta katuk siakyriukrēnikitsa hurukwy eze tu. Atahi Sesus soho nitsasoko iwatahi kytsa siakyriukrēnikitsa hurukwy bo zioқтыhyryknaha. ²⁴Katuktsa Marakos, Aristarakus, Demas, Rukas iwatsa ahahumo sihyrizikbarētsa mykaranaha.

Deus pahasapywyky.

²⁵Deus bo ahatsyhyryze mopamykysoko:

— O Deus myzo Sesus Kiristu ikia tysisapywyky. Siwahi tsimynapykyryk — my. Iwa Deus bo mynapamykysoko. De. Niwazuba.

Pauro niy